

JOEL

'Aisamaira champun ñu
'apákékama këñukin
pia ñuikë bana

1 ¹ Ënë banax ka Joel Petuel
kakë uni aín bakë bëchikë
Diosan ká 'ikën.

² Kamabi uni 'ain tukurikubu
'imainun axa ënë menu
tsókë unikama mitsun
kamina ënë bana 'upiokin
kuati 'ain.

¿Mitsun kaina ësaia ñu 'ia
isan?

¿Mitsun papan kara tsókë
'ixun a nètékaman ësaia ñu
'ia isakët? ka isama 'ikën.

³ Usa 'ain kamina mitsun
bakë bëchikékama 'a bana
ñuixunti 'ain,
ñuixunkëxun ka atúnribi
atun bëchikékama
ñuixunti 'ikën,
ñuixunkëxun ka atúnribi
bakëntankëxa kanirukë
aribi ñuixunti 'ikën.

⁴ Kamabi ñu ka champun
piakëxa, usakin 'akëbë
ukin ka bëtsían pikin
ënkë akama këñukin
bëtsi champu kamanribi
piakëxa. Pikë 'aínbi ka
amiribishi utëkënkín
raírinëñribi piakëxa,
pianbi ka axa utëkënkë
ainra kamabi ñu këñukin
piakëxa.

⁵ ¡Axa paénkë unikama
mitsux kamina bësukanti
'ain!

¡An uvas baka vino 'akë
xëakë unikama mitsux
kamina inkanti 'ain,
'ami mitsun 'ain baka xëakë
uvakama ka champun
këñúaxa!

⁶ Usa 'ain ka champu 'itsaira
ax achúshi suntárukama
kushiira 'ianan 'itsaira
usaribi 'ianan,
paru 'inuánën xëtasa 'ianan
paru 'inuánën xanun
pakasa 'ixun nun mekama
tsitsiruaxa.

⁷ Usai 'ikin ka unin uvas
'apákékama 'anan,
nun higuera 'apákékama
këñukin piaxa,
usakin 'akin ka 'ain xo
këñukin 'ain xaká pianan,
'ain pëñankamaribi uxubu
kuaintanun 'ain xaká
piaxa.

⁸ Achúshi xanux 'ain mërati
an biti uni ñukë 'ain,
inkín uni ñukëbëtan
pañuti chupa pañuax inkë,

⁹ usaribiti ka sacerdote
unikamax inia,
anuxun Dios rabiti xubunu
ka añu ñubi 'aíma 'ianan,
a xëati uvas baka 'akë
'imainun a Dios 'inaínshiti
ñukamaribi 'aíma 'ikën.

- 10 Naëkamanu ka añu ñubi
koima,
mekamax ka uni 'ain 'aintsi
ñukë 'ain masá nuitukë
usaribi 'ikën.
Usa 'ain ka trigo 'apákë
'imainun uvas 'ianan,
olivos akamax ka ëski
chushiaxa.
- 11 Axa naënu ñu mëi tēkë
unikama 'imainun
axa uvas 'apákënu tēkë
unikama mitsux kamina
masá nuituti inkanti 'ain,
ami 'apákë ñukama ka
kamaxi nētéaxa,
'imainun ka anun biti 'urama
'aínbi trigo 'imainun
cebada akamabi këñúaxa.
- 12 'Ianan ka uvas 'apákëkama
'imainun higuera
'apakëkamaribi chushiaxa.
Usai 'imainun ka kaxori,
xëbin, manzana akama
'ianan,
kamabi naënu 'ikë i
kamaribi chushi ëskiaxa.
¡Usai 'ia isi ka 'upiokín sinani
kuënkë a ëni kamabi
unikama nitéxëaxa!
- 13 Usa 'ain kamina
sacerdotekama anuxun
ñuina xarotinu tēkë,
'ain kushibu mitsux chupa
xëni pañutankëx paëi
masá sinani inkanti 'ain,
anuxun Dios rabiti xubunu
ka
ñu bimikama 'imainun a
Dios 'inafnshiti uvas baka
vino 'akë abi 'aíma 'ikën.
- 14 Usa 'ain kamina kamabi
unikama pima samákanun
kati 'ain;
usai 'ixun kamina anuxun
Dios rabiti xubunu uni
aín tukurikubu 'imainun
kamabi unikama a menu
'ikë timéti 'ikën,
anuxun ka Dios atun
'uchakëkama ñuixunti
'ikën.
- 15 ¡Bërí karanuna añu 'ati 'ain,
anúan Dios kushiñuira
an nun tēnētisamaira ñu
'atimaira 'imiti nētë ka
'urama kuatsinia!
- 16 Nukaman ismainunbi ka nun
bërunuxunbi a piti 'apákë
ñukama champun këñukin
piakëxa,
usa 'ain ka unikaman anuxun
Dios rabi xubunuax
kuënkë akama nētéakëxa.
- 17 Usa 'ain ka ñu bëru
'apákëkama ax 'uí
'ibúkëbëma koima ëski
chushiakëxa,
usa 'ain ka trigoribi 'ain bimi
bisama 'inun nētéaxa,
usa 'ain ka anu trigo
bukunkëkama anuaxribi
këñuaxa.
- 18 ¡Vacakama ka mankia!
Ñankáshibi ka vacakaman
pasto bari 'ia,
'imainun ka oveja
'arakakëkama a piti 'aíma
'ain numin bamaia.
- 19 ¡Usa 'ain kananuna mixmi
Dios 'ikë 'akinun mi
ñukatin,

barin xanan ka anu uni
'ikëma menua 'ikë xubi
'imainun naënu 'ikë ikama
chushimiäxa!

²⁰ Usa 'ain ka ñuina
raëkëmakamaxribi
tëmërai banaia,
atúan xëakë xëxakamaribi
ëskimainun,
ka tsin pastokamaribi
nënkin xaroxa.

2 ¹ Aín bashi Sión kakë
anuxun ka manë banañu
banokanti 'ikën,
'anan ka Nukën 'Ibun kaisa
bashi upíira anuxun uisai
ñu 'ikëbëtan a banamiti
aribi banamiti 'ikën.
Kamabi unikama Judá menu
tsókë akamax ka bërëti
'ikën,
Nukën 'Ibun nëtë ka
'uramaxa usa 'ain:
² a nëtëx ka imé 'ianan,
bëánbëankibukë 'iti 'ikën,
'ianan ka a nëtë kuinan
tupéonkë nëtë 'iti 'ikën.

**Suntárukama champu 'itsa
ukësa kuatsini uá ñuikë bana**

Suntáru kushibu 'imainun
'itsaira an ka aín
bashikama tsitsiruti 'ikën,
usokin 'akin ka barin urukin
pékabëtsinkë usaribiokin
'ati 'ikën.
Uinsaranbi ka usai 'ia ñu
uínbi isáma 'ikën, usa
'ain ka únsaranbi bërí
'ikë ësai ñu 'ia uínbi
istëkëntima 'ikën.

³ A suntárukaman ka tsin
ërénrukin bënëkinshi,
kamabi ñu këñukësa okin 'aia;
usa 'ain ka tsi rëkirukiantankëx
'inúkëbë ñankáishi 'ikë
usaribi 'iti 'ikën.

Atúxa kuankëmapain 'ain ka
me upíira 'aish,
Edén kakë naësa 'iakëxa,
'aínbi ka atux kuankëbë anu
uni 'ikëma mesa 'iti 'ikën.
¡'Aíma ka anuäxa abati
'iakëti ñu 'ikën!

⁴ Suntárukama ax ka champu
'itsa iskësa 'ianan,
caballonën nikë unikamaxa
bënëtishi anun abákë usa
'ikën,

⁵ usa 'ain ka bashikamanu
abákian taë banamikë ax
anun 'akánanti caballonën
nirinkë ñu ax bana
kiankësari 'ia,
'ianan ka tsin rëkirukin
nénkëxa pëi chushirukë
banakë usaribiti 'ia.
'Ianan ka suntáru
kushiirabukama 'akanantishi
'aish sëtékë usaribi 'ikën.

⁶ Usa 'ain ka unikamax
suntárukama bëbaia isi
rakuéti
bërëi achúshi achúshi uni
aín bëmánan bépëki
'ikanti 'ikën.

⁷ Usa 'ain ka suntáru rakuëma
kamax 'ikësaribiti
abákianx anun ëma kënëara
anun rorukiani
puntëishi amo kima kuankësa
usaribi kiani kuantu 'ikën.

- ⁸ Usai 'ika champukama
'ikēsai suntárúkama
ax bētsibē bētsibē
bēarananima 'iti 'ikēn;
usai 'ika achúshi achúshitax
anun kuankē anunbi
kuanti 'ikēn,
kuani ka atumi okin atun
pia pukēbēbi
anuax raírībē ēnananima
sēnēnbi kuanti 'ikēn.
- ⁹ Usai 'ika ēmami kikiani
abákianx anun ēma kēnēara
anun rorukiani kuani,
xubukamanu atsínti 'ikēn,
usai 'ika an ñu mēkamakē
unikamax xubu 'ain xēkuē
chukúmakama anun
atsínkēsariibi 'iti 'ikēn.
- ¹⁰ Usa 'ain ka an 'imikēx me
shaíka,
'imainun ka naírībi shaíkīti
'ikēn,
'ianan ka bari 'imainun 'uxē
béankīti 'ikēn,
'imainun ka 'ispakamanriibi
pēkīma nētēti 'ikēn.
- ¹¹ Nukēn 'Ibux ka aín
suntárúkama bētanainuax
kaná banakēsari banai kīti
'ikēn.
Usa 'ain ka aín suntárúkama
'aisamaira 'aish
uínbi tupunkin sēnēoinsa-
maira 'ixunbi an kakēsa-
biokin 'aia.
;Usa 'ain ka anun Nukēn
'Ibu 'uti nētē ax chaiira
ami rakuéti nētē 'ikēn!
Usa 'ikē ka uínbi tēnētīma
'ikēn.

**Nukēn 'Ibun unikamax ka
amiribishi sinanatēkēnti
'ikē kixun ñuikē bana**

- ¹² “‘Ainbi ka —bērī asérabi
Nukēn 'Ibu ēsai kíaxa—,
amiribishi kamina mitsun
nuitunēnbi 'ēmi asérabi
sinanakanti 'ain.
;Usai 'i kamina añubi piima
'ianan munuma kuēnkēni
bēnēti inkanti 'ain!”
- ¹³ ;Amiribishi kamina mitsun
'Ibu Diosmi sinanatēkēnti
'ain,
usai 'ikin kamina mitsun
nuitu mēnīokati 'ain,
chupa mēnīokē usamaira 'ikēn!
Usa 'aish ka Nukēn 'Ibu ax
munu ñu 'ai bēnētīshi
nishkēma 'ianan
nuibanankē 'ikēn,
usa 'ain ka 'itsaira ax
nuibanania,
usa 'ixun ka 'atīma oīsa
tankinbi tēnēkin uni
nuibatīa.
- ¹⁴ Usa 'ain ka Diosan mitsu
'atīma otīma 'ikēn,
'akinma ka sinanatīa okin
'akīnkin mitsu:
ñu bimikama 'imainun
uvas chakaxun aín baka
bīkē 'ianan a 'inafnshīti
ñukama Dios 'inánti 'ikēn.
- ¹⁵ ;Manē banañu aín bashi Sión
kakē anuxun banokēbēa
timētīa kamīna!
Ēmanu 'ikē unikama
pīkēmēti samákanun kati
'ain;

16 sacerdotekama mitsun
 kamina Diosan kaisa
 unikama timëtankëxun
 mëníokanun kati 'ain;
 kanan kamina uni
 kaniakëkëkama 'imainun
 tuákama bërí kanikë
 'ianan,
 tuá aín titan xuma ënkëma
 akamabi timëti 'ain.
 ¡Usai 'imainun ka bëría xanu
 bikëkama axribi anua
 'uxkë anuax unikamabë
 timëti chikínkanti 'ikën!
 17 Sacerdotekama an Diosan
 ñu mëeti 'akë mitsuxribi
 kamina utankëx Dios
 ñukáti inti 'ain.
 Usai ini ka anuxun Dios
 rabiti xubu a bëtanaia 'ikë
 anuxun ñuina xaroti 'akë
 anu sëtëtax ësai kikanti
 'ikën:
 “Nukën 'Ibu Dios min
 unikama kamina atun
 'akë ñu 'atimakama
 mëníoxunti 'ain;
 'anan kamina ñuumara
 ka atux 'ikë kiaux numi
 uinu 'ikë uníxbi kuainun
 'imitima 'ain, nux
 kananuna min kaískë
 unikama 'ai usa 'ain;
 'ianan kamina bëtsi ëmanu
 'ikë unikaman atun
 kuëenkësokin 'amainun
 an bëtsi ñu rabikë unikaman
 numi kuaikin:
 ¿Uinu kara mitsun Dios 'ik?
 kixun nu kanun 'imitima
 'ain.

18 Usa 'ain ka Diosan ax
 nuibanan irakë 'ixun atun
 'akë ñukama sinánkinma
 'ain unikama nuibakin
 ismiakëxa. Usokin aín
 unikama,
 19 'ai ka kiakëxa:
 'Ënbi kana trigo bimi
 'imainun uvas baka 'akë
 vino 'imainun xëni akama
 kuëentanun 'inánti 'ain;
 usokëxa numin 'ianan,
 shimatëkënimá 'ikëbëtan
 kana;
 an bëtsi dioskama rabikë
 unikama mitsumi
 kuaitëkënun 'imitima 'ain.
 20 Usa 'ain kana aín tsipumiáxa
 champu 'itsa ukësa
 kuatsini mitsunu ukë
 suntárúkama
 anu uni 'ikëma menua
 kuantanun xuti 'ain.
 Usokin 'akin kana anpan
 rëkuén kuatsinkëkama a
 parúmpapa bamakë kakë
 anua bakamikinun 'imiti
 'ain,
 'imianan kana axa
 tsiankuatsini ukë
 akamaribi parúmpapa
 mediterráneo kakë anu
 këñunun 'imiti 'ain,
 usokin 'akëx ka aín
 namikama chéki pisiti
 'ikën.
 ¡'Ën kana unin iskëma ñu
 chairabu usokin 'ati 'ain!”
 21 Kamabi mex ka rakuétima
 'itsaira kuëenti 'ikën, Diosan
 ka chairabu ñu 'ati 'ikën.

- 22 'Imainun ka raekëma
ñuinakama axribi menu
ñu kótëkënkëbë rakuétima
'ikën,
pastokamax ka amiribishi
paxaira 'itánun 'irutëkënti
'ikën,
'ianan ka ikamaxribi
'aisamaira aín bimi 'iti
'ikën, 'imainun ka higo
uvas akamaxribi 'aisamaira
aín bimi 'inun bimiti
'ikën.
- 23 ¡Axa Jerusalén kakë 'ikëbi
Sión kakëribi ëmanu tsókë
unikama mitsux kamina
kuëenkanti 'ain,
usai 'i kamina Diosmiribi
sinani kuëenkanti 'ain!
An ka bëráma 'asabiokin
anúan 'ibúti nëtë
'ikëbëtan 'uñe 'ibúmiaxa,
a 'uñe ka mitañu 'ianan
anun ñu 'apákëxa pëkëtia
biti 'uxë anun 'asaribiokin
'ibúmikë 'iti 'ikën.
- 24 Usa 'ain ka 'itsaira bimikë
trigo biti 'ianan,
uvas baka vino 'akë
'imainun 'itsaira xëneribi
'iti 'ikën.
- 25 “Ësai ka Dios kiaxa 'ën kana a
baritiakaman mitsun ñu
'apákë utabakin
champun pía a pain
amiribishi 'inántankëxun,
kana amiribishi utëkëkin
champun pitëkëan
akamaribi inánti 'ain,
'inanxunbi kana utëkënkia
champun pía a 'inanxunbi

kana anuishi sënénkian
champun pía aribi
'inántëkënti 'ain.

'Ën kana suntárुकaman ñu
masókë usaribi okin 'anun
mitsunu xuakën.

- 26 Mitsun kamina 'itsaira ñuñu
'ixun
puchákin pikin mitsun 'Ibu
Dios 'ikë 'ë rabikanti 'ain,
'ën kana mitsu ñu chairabu
'axunin.

Usa 'ain ka 'ën unikamax
katékë bërútkëntima 'ikën,

- 27 'imainun kamina Israel
unikama mitsun 'unánti
'ain,
'ëx mitsun Dios 'aish
mitsubë 'ain,
'ëx kana mitsun Dios a 'ain,
usa 'ain ka bëtsi 'ësaribi
'áima 'ikën.
¡Usa 'ain ka 'ën unikama
uínsaranbi rabinkë
bërútkëntima 'ikën!

**Dios aín Bëru Ñunshin aín
unikama 'inánkatsi kia bana**

- 28 Usakin ënë ñukama pain
'atankëxun kana 'ën
Bëru Ñunshin kamabi uninu
xuti 'ain:
Usa 'ain ka mitsun bakë
bëchikë bëbukama 'imainun
ini bëchikë xanukama atun
'ën bana ñuiti 'ikën,
'amainun ka uni xënikaman
namákin isti 'ikën,
'imainun ka uni bënëbu
atúnribi namákësa okin
isti 'ikën.

29 'Imainun kana an mitsu ñu
mëëxunkë uni
'imainun xanukama
atunurubi 'ën bëru
ñunshin a nëtëkaman xuti
'ain;

30 Usokin 'akin kana 'ën kushi
ismikin
ñu chaiirabu 'akin imi tsi
rëkirukë 'imainun nëtë kuin
tëxëkirukë akama 'imiti
'ain.

31 Usa 'ain ka bari pékaima
bënamainun
'uxën pëkakë axribi imi 'iti
'ikën,
usai ka Diosan nëtë chaiira
ax ami rakuéti 'iti 'ikën.”

32 'Aínbi ka kamabi unikama
an Nukën 'Ibun anë rabikë
atun bamatinuax iéti tanti
'ikën,
usa 'ain ka aín bashi Sión
kakë Jerusalénnu 'ikë anu
ka anua atux iéti 'iti 'ikën.
Nukën 'Ibu usai ka 'iti 'ikë
kiax kíasabi oi.
Usa 'ain ka an kaískë
unikamax bamanuxbi
tsókëpan 'iti 'ikën.

**Diosan axa ami nishkë
unikama tëmëramikëbëa
aín unikamax upitax
tsóti ñuikë bana**

3 14 “Ésai ka Dios kíaxa:
Uínsaran nëtën karana
axa ami nishkë unikaman
tëmëraminun 'ain menu
uan 'ën unikama bëtëkëni
anun ka Judá menu 'ikë

'imainun Jerusalén ëmanu
tsóti 'ën unikama utëkënti
'ikën.

2 Usakin 'anan kana axa
atumi nishkë bëtsi menu
'ikë unikama,
timëbiankin Josafat kakë
me sapan anu uanti 'ain,
anuxun kana uisakin
karana 'aisatani usakin 'ën
unikama Israel 'asaribiokin
'ati 'ain. (Josafat kikë bana
ax ka Diosan uisa kara
oisatania usakin 'ati kikë
bana 'ikën.)

Atun ka 'ën uni Israelkama
bëtsi bëtsi menu abístanun
'imianan,
'ën atu 'inánkë me
'inánankin bikankëxa.

3 Usakin 'akin ka ñuratsu
amo rabébi kuënëoxun
anun pain tantankëx, 'ën
unikama 'inánankëxa,
usakin 'anan ka bëbu
tuákama 'imainun
xanu tuákamaribi
marukankëxa,
usakin 'atankëxun ka atu
marukia bikë kuríki anun
uvas baka paëokin 'akë a
maruxun xëanan bëtsi
bëtsi unin aín nami 'akë
xanukamaribi aín nami
'axun kupiókëxa.

**Dios ëmakama uisa
kara okatsia usokin
'akatsi kia bana**

4 ¿Añu kaina Tiro, Sidón ëmanu
'ikë 'ianan Filisteokaman menu

'ikë unikama mitsun 'ëbëtan kuëënin? ¿Mitsun kaina 'ë 'atima oti sinánkanin? ¿Añu kaina ënuá bisatankanin? ¡'Ën kana bënëkinshi uisokin karana 'aisa-tani usakin mitsu tëmëramiti 'ain! ⁵Mitsun kamina 'ën manë uxua, 'imainun kuri akama mëkamakën, 'ianan kamina ñu kupikëirabu 'ianan upírabu a mitsun dios anuxun rabiti xubukamanu buánkën. ⁶'Ianan ka axa ami nishkë unikaman Judánu 'ikë unikama 'ura buánan Jerusalénnu tsókë unikama an ñu mëëmikin tëmëraminun griego unikama maruakëxa. ⁷'Aínbi kana 'ën mitsun marua 'aísha anu 'ikaniabi atu chikínkin atux 'iásaribitimi mitsúxribi tëmëranun 'imiti 'ain. ⁸Usakin 'anan kana atun bakë bëchikë bëbu 'imainun ini bëchikë xanukama Judíos unikama marunun 'amiti 'ain, 'amikëxun ka atun 'uraira menu tsókë sabeo unikama a marutëkënti 'ikën. 'Ëx Dios 'aish kana ësaí kin.”

- ⁹ Ësaí ka Dios kiaxa: kamabi ëmanu 'ikë unikama ka ësokin kati 'ikën:
 ¡Kamabi aín suntárukamaxa Diosan unikamabë 'akananux mëkëti mëníokanun ka kati 'ikën!
 ¡Axa 'akánanti rakuëma suntárukama a kamina kuënti 'ain!
 ¡Usakin 'akëx ka 'akánanti 'unairakama ax abi rëkuënkiani 'akanani kuanti 'ikën!

- ¹⁰ Kuakin ka atun manë sëbía chaxké a manë xëtokin anun 'akánanti 'anan, machitusa tëntuñukama aribi atun masínbu 'ati 'ikën, usakin 'amainun ka ñuumara ka kixun iskëkama atux kiti 'ikën: “¡'Ëx kana kushi 'ain!”
- ¹¹ Kamabi ëmanua 'ikë unikama a 'urama 'aísha atumi nishkëkama atux, ¡bënëtishi timékuatsini 'akanani 'uti 'ikën!
 ¡'Imainun ka uni upí sinánñu axa 'akánanti kuëenkëmakama atúnribi ka 'akánanti sinánti 'ikën!
- ¹² Kamabi ëmanu 'ikë unikama a 'urama 'ikë atumia nishkë ax ka mëníokakiani Josafat kakë me sapan anu kuantí 'ikën, anuxun ka Diosan axa atumi nishkë a 'urama 'ikë unikama uisa kara oti 'ikë a istankëxun usokin 'ati 'ikën.
- ¹³ Atux ka 'atima ñuira 'akë uníbu 'ikën, usa 'ikë ka trigo bimi pëkéké tëakin bikësaribi okín 'ati 'ikën; usa 'ain ka anun bití nëtë 'ikëbëtan bikëxa trigo bimi nëtékë usaribi okín 'anan, uvas bimi aín baka vino 'ati bitishi 'ikë chakakë usaribi okín 'akánti 'ikën.
- ¹⁴ 'Itsaira unika anuxun uisakin kara 'ati 'ikë kixun sinánkë me sapan anu,

Diosan nētē ka 'urama 'ikē
usa ain.

- ¹⁵ A nētē 'ikēbētan ka bari,
'uxē 'imainun 'ispa
akaman pékatima 'ikēn.
¹⁶ Uínsaran kara Dios munuma
banai kaná banakēsari
aín bashi Sión kakē anuax
'ianan
Jerusalénua 'ia kuakania
anun ka
naíkamē 'ëo 'imainun
mekama shaíkiti 'ikēn.
'Aínbi ka Diosan Israel
unikama ami katamētia
'akinti 'ikēn.

**Judá menu 'ikē unikama
usai 'iti ñuikē bana**

- ¹⁷ Mitsun kamina 'unánnuxun
'ain 'ëx kana Dios aín bashi Sión
kakē anu 'i kixun.
Jerusalén ax ka achúshi ëma
upíira upí 'iti 'ikēn:
Usa 'ikē ka uínsaranbi bëtsi
menu 'ikē unikaman
bitékëntima 'ikēn.
¹⁸ Usa 'ain ka a nētē 'ikēbētan
Diosan
ñukama sënëónkē 'ain,
a menu piti ñu 'imainun a
xëati

ñukama 'itsaira 'aish aín
bashikama 'imainun me
sapankama anua 'umpax
iskēsaira 'iti 'ikēn.

'Imainun ka Judá menu
'ikē xëxákama ax 'itsaira
'umpaxñu 'iti 'ikēn.

'Imainun ka anuxun 'ë rabiti
xubu anuax achúshi xëxá
upíira chikíkin ka Sitim
kakē me a chabóti 'ikēn.

- ¹⁹ Usai 'ikēbē ka Egipto me ax
rurupakin 'atima okē 'iti
'ikēn,

'imainun ka Edom kakē
axribi anu uni 'ikēma
mesa 'iti 'ikēn.

Atun ka Judánu 'ikē
unikama ñu 'atima

'akēmabi 'akin aín menubi
aín 'imi 'apamikin 'akëxa.

- ²⁰⁻²¹ Usa 'ain kana 'ën an ñu
'atima 'akëma uni akama
kana 'aima kikínma 'ati
'ain.

'Aínbi ka Judá 'imainun
Jerusalén ax anu uni tsókē
'iti 'ikēn,

'imainun kana 'ëx Dios
'aish aín bashi Sión kakē
anu 'iti 'ain, kiaux ka Dios
kiakëxa.